

Date – 06/12/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Chief Minister Pu Lalduhoma'n Inrenchem kawngah Assembly legislator ten bul an tan a ti.
2. Rajya Sabha MP Pu K.Vanlalvena'n Sangau atanga Saisihchhuah inkar kawng sialna tur sum hnuh let chu a rem loh thu DoNER Consultative meeting ah a thlen.
3. BJP hruaitu Devendra Fadnavis chu Maharashtra Chief minister atan nimin tlai khan lakluh a ni.
4. Parliament chuan Bharatiya Vayuyan Videhyak 2024 a pass.

<><><>

CM

Chief Minister Pu Lalduhoma'n Inrenchem kawngah Assembly legislator ten bul an tan a ti.

Aijal Club Conference Hall-a Mizoram Finance & Account Service Association te 29th Annual General Conference nimina a hmanpui na ah he thu hi sawiin Chief Minister chuan Inrenchem kawngah Assembly legislator te hamthatna tihtlem niin official te pawh an ti tlem a, hei hian nasa takin sawrkar sum kal ral tur a veng thei a ti a, sawrkar hnathawk hlawh chu mi tamtak innghahna anih avangin muang loa buaipui vat zel a ngaih tih sawiin central scheme behchhanna hlawh la te harsatna tawh chinfel dang kawng ngaihtuah sak a pawimawh thu a sawi bawk.

Chief Minister chuan Kalphung thar sawrkarah officer te eirukna lakah an fihlim ngei tur a ni a ti a, sum puk tlem an duh tih sawiin overdraft loa kal hram an tum a ti a, K. Deposit tih tlem an tum bawk a ti. State sum leh pai dinhmun siamtha turin an tang hle ni a sawiin, a tlem thei anga sum puk an duh a, state matching share nei sang chi scheme chu a tam thei ang bera pumpelh a ngai a ti.

Pu Lalduhoma chuan Healthcare bill ba, MR bill ba tihfel an tum zel a ti a, Kalphung tharah sawrkar hnathawkte eirukna lakah an fihlim tur ani tih sawiin Mizoram mipuiten an beisei inrelbawlina tha a awm theih nan project monitoring lamah tan an la nasa a ti a, Bana Kaih hnuaiah eizawanna mumal zawk mai nilo mimal nunphung leh rilru thlenga hmasawanna a awm theih nan sawrkarin theitawp a chhuah thu a sawi bawk.

<><><>

ADVISER TO CM

Adviser to Chief Minister Pu H. Ginzalala'n Mizoram leh Manipur inkalpawhna kawng siamtha turin sawrkarin theihtawp a chhuah a ti a, Helicopter service tam zawk a awm theih nan sawrkar laipuih an dil tih a sawu bawk.

Manipur-a zohnahthlak Martar 12 te sunna hun Peace Ground, Tuibuang-a neih a hmanpui na ah he thu hi sawiin Pu Ginzalala chuan Mizoram leh Manipur inkalpawhna kawng tha a awm theih nan sawrkarin hma a la mek a ti a, furpui thlen leh hma ngeiin kawngpui tha neih an tum tih sawiin Tuivai lei dawh hna pawh thawh mek a ni a ti a, Helicopter service a awm theih nan theihtawp chhuah a ni tih sawiin Khawdungsei ah helicopter service a awm theih nan sawrkar laipuih an dil a ti a, Mizoram chu chak lakna pawimawh tak anih avangin theihtawp an chhuah mek a ti bawk.

Champhai North bialtu MLA chuan Manipur zohnahthlak te chu inngeih tlang taka tan ho a pawimawh a ti a, induhsaka inhmangaih tur annih laiin inlungruallohna a awm thin chu pawu a tih thu sawiin tangrual turin hnam tin te tan lak thar a pawimawh a ti bawk.

Pu Ginzalala chuan Mizoramah hnam tenau te duat tak leh tha taka enkawl thin an ni a ti a, hnam te zawk te chu duhsak an hlawh thin tih sawiin rorelna tha a awm avangin hnam hrang hrang awm mahse inlungrual takin an awm thin a ti a, Manipur ah erawh rorelna tha a awmlah avangin hnam tenau te nek chep an ni a ti a, sawrkar laipui chu a rang thei anga an buaina chingfel tura an duh thu sawiin inremna tluantling a awm theih nana hma la thuai turin an duh thu a sawi bawk.



RS MP

Rajya Sabha MP Pu K.Vanlalvena'n Sangau atanga Saisihchhuah inkar kawng sialna tur sum hnuh let chu a rem loh thu nimina DoNER Consultative meeting ah a sawi.

Mizorama Rajya Sabha MP Pu K. Vanlalvena chuan Parliament Monsoon session neih zawh takah August ni 8-a a zawhna Union Minister of State for DoNER Sukanta Majumdar an Myanmar ramri panna kawng Sangau to Saisihchhuah kawng sialna chhanna chungchang he thutkhawmah hian a sawi chhuak a, kum 2021 February ni 10 ah he kawngpui lai hna tur pawisa chu DoNER in NEC kaltlangin sanction order a tihchhuah thu leh hna thawktu atan Mizoram PWD thlang lova BRO an thlan zawk avanga harsatna tawk an nih thu a sawi.

Development of North Eastern Region(DoNER) Consultative meeting hi Parliament Anexie building Committee roomah Union Cabinet Minister of DoNER PU Jyotiraditya M.Scindia kaihhraina in an thu khawm a. DoNER hnuaia North East state a hmasawna hna thawh lai mek te chungchang an thlir ho.

Pu K. Vanlalvena chuan PWD te ruahmanna pawm duh lova BRO ten Pangkhua paltlanga kawngpui sial an tum avang leh Pang khaw mipui ten compensation pek an phut avanga he project hi kal tluang lo a nih thu sawiin PWD te ruahman ang chuan kawngpui hian khawchhung a paltlang dawn loh avangin compensation ah harsatna a awm dawn loh thu a sawi a, project chu

Chief Minister kalchhuak Pu Zoramthanga ngaih pawimawh zing ami a nih avangin pawisa pek tawh hnuhkir chu a remloh thu a sawi bawk.

He thutkhawmah hian Meeting Chairman leh DoNER Minister Jyotiraditya M. Scindia chuan hemi chungchang hi hun dangah uluk zawka sawi dun pui turin Pu Vena chu a sawm a. A tul dan anga a bawhzui tur thu a sawi bawk a ni.



ZOFEST CLOSING

West Phaileng-a Mizo Zirlai Pawl MZP buatsaih Zofest 2024 chu nizan khan Agriculture Minister Pu PC Vanlalruatan a hmanpui a,

Minister chuan Zofest chu Zohnahthlakte tan hnam inpumkhatna hmanrua pawimawh tak a nih thu a sawi a. Thenawm state te nen in lungrual tak a an awm chu lawmawm a tih thu sawiin inunauna chhawm nung zel tur leh inpumkhat a cheng ho zel turin Minister chuan a chah a. Pu PC Vanlalruata chuan Zohnahthlakte chu insuihkhawm a ralmuang tak a kan awm tlan zel theih nan hmalak zel a ni a ti.



SCHOOL BAG

Sikul naupangte sikul kai ip rit lutuk avanga zirlaite'n harsatna an tawh loh nana hma lakna kal mek chungchang sawi hovin vawiin khan Lunglei DC Conference Hall-ah District Bawrhsap Pi Navneet Mann kaihhruaiin thut khawm a ni.

He thut khawmah hian Lunglei District chhunga sikul tin dinhmun hriat a nih theih nan report format siamin sikul tin chhantir ni se tih a ni a, endikna tur checklist thar nen kum thar lamah sikul endikna kalpui chhunzawm a. Sikul hotute ko khawma hma lak dan tur inhrilhfiahna leh sawi hona buatsaih rel a ni bawk.



MAHARASTRA CM

BJP hruaitu Devendra Fadnavis chu Maharashtra Chief minister atan nimin tlai khan lakluh a ni a. Mumbai-a Azad Maidan-ah Governor CP Radhakrishnan chuan rinawmna thu tiam tirin a lalut a ni.

Chief Minister rual hian Deputy Chief Minister atan Shiv Sena hruaitu Ekhnath Shinde leh NCP hruaitu Ajit Pawar te chu lakluh an ni bawk a ni.

Maharashtra Chief Minister lakluh inkhawmah hian Prime Minister Narendra Modi, Union Home Minister Amit Shah, BJP President JP Nadda, Union Minister, Governor, NDA sawrkarnaa Chief Minister, party official leh Mahayuti hruaitute an tel a ni.

Maharashtra Assembly inthlan neih zawh takah khan BJP kaihhruai Mahayuti hian seat 288 ah 230 an la a. Mahayuti ah hian BJP bakah Shiv Sena leh Nationalist Congress party te an tel a ni.



BHARATIYA VAYUYAN VIDEHYAK 2024

Parliament chuan Bharatiya Vayuyan Videhyak 2024 a pass. He bill hi kumin fur thutkhawmah Lok Sabha chuan a lo pass tawh a. Nimin khan Rajya Sabha chuan a pass ve leh a ni. He dan thar hnuaiah hian sawrkar laipui chuan thlawhna him leh him loh chungchangah thuneihna a nei dawn a ni. Hei bakah hian thlawhna chesual a awmin a chhuui dan turah sawrkar chuan dan a siam thei dawn bawk a ni.

Zawhna chhangin Union Minister of Civil Aviation K. Rammohan Naidu chuan sawrkarin aviation sector ah dinhmun thar chuangkai turin theihtawp a chhuah tih a sawi a ni.



BHUTAN KING MET PM

Bhutan lal King Jigme Khesar Namgyal Wangchuk leh a nupui Queen Jetsun Pema Wangchuk te chuan nimin khan New Delhi-ah Prime Minister Narendra Modia an hmu a. An inkawmnaah hian Pu Modia chuan Bhutan hmasawna tura Jigme Khesar Namgyal Wangchuk chu fakawm atih thu a sawi a. Pu Modia chuan India leh Bhutan inlaichinna chu hmasawn zel turin hma an la zel dawn a ti bawk.

